

Kementerian Wilayah Persekutuan sasar anak OKU terima latihan kemahiran

Samadi Ahmad - Februari 21, 2022 @ 5:14pm
bhnews@bh.com.my



Shahidan (tengah) bersama pelajar OKU PDK Presint 14 di Putrajaya, hari ini. - NSTP/SAMADI AHMAD

PUTRAJAYA: Kementerian Wilayah Persekutuan (KWP) menyasarkan anak-anak dari kalangan orang kelainan upaya (OKU) menerima latihan kemahiran di Pusat Pemulihan Dalam Komuniti (PDK) bagi memastikan kebajikan mereka sentiasa dibela.

Menterinya, Datuk Seri Dr Shahidan Kassim, berkata, KWP akan memberi perhatian terhadap isu itu supaya golongan terbabit tidak ketinggalan dari segi latihan, pendidikan, pemulihan serta integrasi sosial berbanding individu normal.

Katanya, terdapat sesetengah keluarga yang tidak memahami masalah itu sehingga membiarkan anak-anak OKU di rumah tanpa mendapat latihan di PDK yang disediakan kerajaan di sesebuah komuniti.

"Saya berharap tiada anak-anak OKU yang terpinggir daripada mendapat latihan. Sekiranya ada, boleh menyalurkan maklumat kepada KWP yang mempunyai jentera bagi mengatasi masalah ini, termasuk membantu golongan miskin meneruskan kehidupan," katanya.

Beliau berkata demikian pada Program Semarak Kasih Sempena Hari Wilayah Persekutuan 2022 Bersama Pelajar PDK yang turut dihadiri Ketua Setiausaha KWP, Datuk Seri Rosida Jaafar dan Naib Presiden Kanan Perbadanan Putrajaya (PPj), Datuk Fadlun Mak Ujud, di sini hari ini.

Pada program anjuran bersama PPj dan Yayasan Wilayah Persekutuan (YWP) itu, Shahidan turut menyampaikan sumbangan peralatan terapi berjumlah RM40,000 kepada empat PDK. PPj pula menyumbang baucar beli-belah RM100 kepada setiap pelajar, manakala YWP menyumbang bakul makanan kepada setiap pelajar dan petugas.

PDK Putrajaya Presint 14, PPDK Sinar@9 Putrajaya Presint 9, PPDK Sindrom Down Presint 11 dan PPDK Permata Hati Presint 11 yang menerima peralatan terapi itu, menempatkan keseluruhan 136 pelajar.

Sumbangan merangkumi set anatomi, 'multiactive stones' dan 'Disc 'O' Bocce' untuk kegunaan kelas praterapi, pravokasional dan fisioterapi yang berupaya meningkatkan potensi latihan mereka di PPDK.

PDK diwujudkan Jabatan Pembangunan OKU, Jabatan Kebajikan Masyarakat (JKM) sebagai satu strategi dalam pembangunan komuniti setempat bagi pemulihan, latihan, pendidikan, penyamaan peluang dan integrasi sosial OKU.